



Opšte informacije o privremenim mjerama

Šta su privremene mjere?

U skladu sa Pravilom 39. svog Pravilnika, Sud može odrediti privremene mjere svakoj [državi ugovornici](#). Privremene mjere su hitne i u skladu sa ustaljenom praksom Suda, primjenjuju se samo kada postoji **rizik od nepovratne štete** (vidjeti [Mamatkulov and Askarov v. Turkey](#) [GC], nos. 46827/99 i 46951/99, § 104, 4. februar 2005., i [Paladi v. Moldova](#) [GC], no. 39806/05, §§ 86-90, 10. mart 2009).

Privremene mjere se primjenjuju isključivo u **izuzetnim okolnostima**, najčešće u slučaju:

- opasnosti po život (situacije koje spadaju pod član 2. Konvencije) ili
- opasnosti od zlostavljanja zabranjenog članom 3. Konvencije (zabrana mučenja, neljudskog ili ponižavajućeg postupanja).

Izuzetno, u specifičnim okolnostima, primjenjuju se i u slučajevima koji se odnose na neka druga prava zaštićena Konvencijom.

Većina privremenih mjera koje Sud odredi se odnose na procese protjerivanja ili izručenja, ili na zdravstveno stanje podnositelja u pritvoru.

U skladu sa ustaljenom praksom Suda, sudija neće odlučivati o zahtjevima koji očigledno ne spadaju u područje primjene Pravila 39. kao ni o preuranjenim, nepotpunim i neobrazloženim zahtjevima, te će oni biti odbačeni.

Način i vremenski rok za razmatranje zahtjeva za privremene mjere

Zahtjevi za privremene mjere se razmatraju pojedinačno u pisanoj proceduri. Obrađuju se **prioritetno** osim ako nisu s namjerom podneseni u cilju odugovlačenja postupka.

Sud obavještava podnositelje o odlukama u vezi sa zahtjevima za privremenu mjeru putem internet stranice *ECHR Rule 39 Site*, faksom ili poštom. Ne postoji mogućnost žalbe na odluku o odbijanju primjene Pravila 39.

Trajanje i ukidanje privremene mjere određene u skladu sa Pravilom 39.

Privremene mjere mogu biti odobrene za vrijeme trajanja postupka pred Sudom ili na određeni vremenski period.

Mjera primijenjena u skladu sa Pravilom 39. može se odlukom suda ukinuti u bilo kom trenutku. A naročito, s obzirom da je određena shodno Pravilu 39. u vezi sa postupkom pred Sudom, mjera se prekida ukoliko podnositelj odustane od predstavke.

Udaljenje u drugu državu članicu

Kada je osoba čiji je zahtjev za privremenu mjeru odbijen, udaljena u drugu državu članicu, ona može, ako je potrebno, podnijeti novi zahtjev protiv te države u skladu sa Pravilom 39. Pravilnika Suda ili novu predstavku shodno članu 34. Konvencije.